

天順

皇華集

三

卷二十五



皇華集卷之六編目

天順八年甲申頒登極詔使一

正太僕寺丞金湜

副中書舍人張瑛

遠接使禮曹判書朴元亨

蘇詩對韻唐詩林氏

偶中書舍人

五大對千金

大照八平甲申

華集卷之六

序

東方自殷太師受封以來代事 上國衣冠文物
悉擬華制逮我 國家之興也 明王代作盡藩
宣保釐之寄明會同述職之禮事大以誠侯度罔
愆故朝廷待之與內諸侯不異凡有 詔命必遣
使來而皆文章才行有重望於當時者爲之使若
倪侍講陳內翰及陳給事張給事是數先生並經
幄之臣金閨之彥圭璋聞望斧藻詞華東人仰之
如景星儀鳳實一代之高選也是雖出於朝廷寵
綏之惠而亦以我 國家素秉禮義文獻所在故

也今皇上新登寶位與天下更始用祖宗舊典首遣使布德音於是太僕金先生舍人張先生亦以侍從之貴出膺專對之選雙鳳聯翩止于海東敷暢綸音大需鴻恩周旋升降充乎有容可謂樂只君子邦家之光也已矣殿下感皇仁之深眷樂詔使之爲人自始至暨竣事凡所以致敬於先生達誠於朝廷者無所不用其極又命有司取紀行題詠之什纂爲一帙附以東人酬答之篇名曰皇華集仍命臣序之欽惟皇明撫有區夏混一車書三光五岳之氣全而加以列

聖重光文教大振海涵春育罔間遐邇人才之作
於斯爲盛蘊而爲道德發而爲文章上自明廷賡
載之歌下及康衢擊壤之謠泯泯乎有雅頌之遺
音焉是以使於四方者無非大雅之儒今太僕舍
人兩先生繼倪陳數先生之後其學行之高文雅
之美蔚然前後相望由燕山抵鰐域凡四千里之
間觸乎目而感於心者奮筆而書之長篇短章爛
若編貝採掇風謠述宣上德使聖朝一視同
仁之化吾王畏天保民之忠赫然炳耀於天下
可以被之八音傳諸萬世而東人之詩亦得同垂

於不刊卽國風魯頌並列於三百篇之義也何其
幸哉天順八年甲申秋八月上澣嘉善大夫藝文
提學世子右副賓客臣李承召謹序

皇華集卷之六

三月二十四日奉 命出京有作求和章

金湜

鳳皇嚙 詔出甘泉一日歡聲動八埏草木盡沾新
雨露江山不改舊風煙九天日月無私照萬古華夷
仰正傳散職濫充藩國使丹心只在五雲邊

次韻

藝文檢閱李瓊仝

龍飛大德仰淵泉新霈汪恩溥八埏玉節乍輝暘
谷日錦袍猶惹 御爐煙一頌 鳳詔三韓去千
載鴻名四海傳歸到朝端爭屬耳鯨濤夜靜海東

邊

過三河縣求和章

金湜

三河驛路去迢迢一騎前驅引使輶遍野桑添春後
葉連天麥秀臘前苗民無負券頑風息吏有廉名積
弊消處處看山兼問俗從頭編作太平謠

次韻

成均直講鄭永通

平郊如掌綠迢迢有客閒乘使者輶四月江城梅
已子幾家籬落豆初苗征衫半摺翻翻起別酒微
醺旋旋消漸入遼陽風景好作詩端爲採民謠

高嶺曉行求和章

金湜

一路青山得縱觀又騎官馬歷巔峴層巖露重知天
近遠岫風多覺地寬壓樹白雲深似海照人紅日大
如盤琅玕芝草無尋處折得松花不耐看

次韻

刑曹叅判任元濬

次第名區屬壯觀行行信馬陟巔峴肩山自並高
山聳眼海還同遼海寬試出津關四千里不愁蜀
道三百盤異鄉雲物渾詩思穩跨征鞍仔細看

山海關會江尚書自鐵嶺軍中還求和章

金湜

曉日初升宿霧消披雲重見雪霜標却將遠塞從軍

樂散作康衢擊壤謠百歲丹心終戀闕幾人白髮
舊同朝玉河堤畔尚書宅已漏春風到午橋

次韻

吏曹叅判洪應

山海關前雪半消使華高節見風標長途慣作逢
人別載路忻聞祝聖謠東海遙看千里遠北
辰長憶五更朝問君江令還家日家在長安第幾
橋

出山海關二首求和章

金湜

長城萬里絕天驕更設重關插漢標一路有山皆近
海百川無水不通潮平胡老將思歸國奉詔詞臣

欲渡遼自是華夷俱按堵豐功千古頌 神堯

其二

山海樓頭畫角聲分明喚起出關情秦王舊島潮初
沒姜女遺墳草未生將壘重重烽候息沙場渺渺塞
塵清遐方此去心偏壯還聽行人說治平

次韻

刑曹佐郎金 輶

榆塞無塵馬自驕譙樓粉堞拔高標地連朔漠天
分塹水擁關河海送潮萬古江山屬幽薊百年爭
戰想金遼誰知奉 詔皇華使採得風謠贊 聖
堯

春風周道馬蹄驕爭議儒僊玉雪標睥睨雲橫圍
古塞溟波雪湧漲寒潮數聲鼓角通藩落一路風
煙接定遼關吏不須嚴擊柝太平天子是神堯

中樞院副使李文炯

五更空館聽雞聲山海重關萬古情盛代堪誇持
節客當年誰數棄繻生長城萬里連雲去瀚海千
尋徹底清好向東藩宣聖化歸來紫閣奏昇平

過山海關

金湜

雲山迢遞接天來突兀關門徹曉開日色未臨回馬
寨笛聲先繞望夫臺只今當路崇儒術自古邊城重

將才滿地塵沙春雨後萬株官柳碧於苔

次韻

同知中樞宋處寬

長城雄跨海門來百二重關向此開大漢威風罩
玉塞全燕白日照金臺將軍自有平戎策戍客疇
非禦侮才夜靜不聞刁斗警綠沈閒卧鎖蒼苔

夜宿高平

金湜

孤城如斗近邊壕壯士誰當夜屬橐極目黃河平似
掌深春碧草細於毛持符過客風煙思駐馬將軍虎
豹韜無處解貂堪換酒只披肝膽慰賢勞

次韻

議政府左叅贊崔恒

煙林隱約認城壕

聖代戈矛已載橐胡虜聞笳

竄窮髮將軍高枕解吹毛漢庭不用煩三表周室
何須講六韜潤色太平儒老在遠遊客訪肯辭勞

出遼陽城東行

金湜

遼陽城外雨初晴綠柳薰風趁曉行壯士按歌當去
路總戎停酒計歸程雙旌拂霧千山合一劒橫空萬
壑清東望石門開嶺嶠馬蹄如雨雜笳聲

次韻

藝文提學李承召

河橋楊柳弄新晴四牡雙旌奉詔行鳳闕九重
勞北望鴨江一帶隔前程笳因出塞聲聲壯詩得

開懷字字清四海正逢同軌日
皇恩到處沸歡聲

過丁家嶺

金湜

嶺頭松樹插天青嶺下人家舊姓丁
沽酒且須尋地主將詩不必弔山靈
問誰別有神仙骨老我真成瘦鶴形
回首遼陽三百里落花啼鳥晝冥冥

次韻

藝文檢閱成
倪

巖壑如削土花青鑿路還疑借五丁
澗有白雲堪寄傲林多黃獨可通靈
絲囊未試飛昇術塵世寧完土木形
高處且須回首望翛然清興入玄冥

過連山關

金湜

天設重關險處多山深有路許誰過
煙嵐澗底龍蛇窟風雨中虎豹窩
花氣醺人嚴似酒棘枝當路勢如戈
誰知奉詔經行客却付辛勤入詠歌

次韻

工曹判書金守溫

關門簇簇亂峰多日下詞臣杖節過
直北山川連列鎮從東車馬作行窩
殊方慕義爭輸欵聖代修文早偃戈
况值重華新御極薰風吹入五絃歌

過八渡河

金湜

十分行路九蹉跎又涉東寧八渡河
面面青山看更

熟重重綠樹轉還多馬蹄蹭蹬心應折
王事踟躕
鬢易皤怪底山禽啼不斷幾回如訴又如歌

次韻

議政府左舍人朴 槿

遼陽東出走蹉跎叱馭君今渡幾河峽裏居民茅
屋小路傍歇馬樹陰多遊觀自信襟懷壯行役從
教鬢髮皤咨訪也應懷靡及皇華重爲使華歌

題鳳凰城

金湜

鳳凰山下鳳凰城猶記金章舊築名一入中朝聲
教後便看諸國往來并雲煙慣作從風勢草木常含
向日誠偶爲題詩閒駐馬新秋時節是歸程

過連山關

金湜

天設重關險處多山深有路許誰過
煙嵐澗底龍蛇窟風雨林中虎豹窩
花氣薰人嚴似酒棘枝當路勢如戈
誰知奉詔經行客却付辛勤入詠歌

次韻

工曹判書金守溫

關門簇簇亂峰多日下詞臣杖節過
直北山川連列鎮從東車馬作行窩
殊方慕義爭輸欵聖代修文早偃戈
况值重華新御極薰風吹入五絃歌

過八渡河

金湜

十分行路九蹉跎又涉東寧八渡河
面面青山看更

熟重重綠樹轉還多馬蹄蹭蹬心應折
王事踟躕
鬢易皤怪底山禽啼不斷幾回如訴又如歌

次韻

議政府左舍人朴 槿

遼陽東出走蹉跎叱馭君今渡幾河峽裏居民茅
屋小路傍歇馬樹陰多遊觀自信襟懷壯行役從
教鬢髮皤咨訪也應懷靡及皇華重爲使華歌

題鳳凰城

金 湜

鳳凰山下鳳凰城猶記金章舊築名一入 中朝聲
教後便看諸國往來并雲煙慣作從風勢草木常含
向日誠偶爲題詩閒駐馬新秋時節是歸程

次韻

領議政府事申叔舟

蒼山壁立擁皇城昔日西遊尚記名
金孽偷生窺竊據元兵縱勢事兼并
聖朝文軌同寰宇萬國梯航競至誠
往事區區何足問淡煙疎樹暗行程
千古遺墟石作城英雄一去尚畱名
龍爭擾擾誰能保蠻戰紛紛空自并
聖代卽今通遠道東方從古效微誠
暮江煙雨應依舊夢逐星槎雲水程

將至江頭夜宿土民家

金湜

冒雨隨風馬上來野人相見不相猜
數椽茅屋依山住半葉柴門傍水開
稗酒易渾隨意酌麻衣雖薄趁

時裁詩成不敢高聲讀只恐浮名動草萊

次韻

司憲監察金宗直

并岸田家絕往來忽逢車馬不驚猜
百年按堵徵求少十室登臺笑語開
山擁衡茅青遠繞風穿細葛白新裁
牧童亦識皇華使樂只長歌山有萊
使華行色渡江來魚鳥欣迎亦不猜
島嶼煙橫微雨過海門潮上遠帆開
一區仙境堪清賞千首詩材輒易裁
上界羣仙應入夢五雲深處想蓬萊

題道傍枯柳求和章

金湜

道傍枯柳幾經年猶使行人淚泫然
漢苑移來含曉

露隋堤分後斷秋煙消殘舊恨知多少剖盡芳心有
萬千正爾槎牙難識處欲將生意問張騫

次韻

議政府右舍人成允文

楞然骨立已多年心與寒灰不復然已是無機承
雨露何曾有線惹風煙恨深才士詩三百興斷遊
人酒十千會見生華陽長日金衣依舊更來騫

過鴨綠江

金湜

慣看山色與江波恍惚薰風四月過到岸已知潮信
早登程不厭路歧多農夫戴笠鋤禾黍海客乘舟拾
蚌螺一片越南風景在經行無奈野情何

次韻

禮曹判書朴元亨

亭院深深枕碧波江鷗相狎自相過
雲低遠樹煙光媚雨歇芳洲草色多
畫舸浮浮飛彩鷁層巒隱隱點青螺
鳳池有客裁新曲擬和陽春可奈何

工曹叅判姜希孟

江頭簫鼓殷晴波江上征人倚棹過
地接扶桑初日近天臨蒼海暮雲多
蛟龍出沒千尋窟島嶼微茫數點螺
汪濊恩波隨處闊不妨蕩槳飲無何
畫船歌吹鬧蒼波齊榜中流取次過
鐵騎如雲連野暗霓旌蔽日簇江多
水分地界橫羅帶山入胡

天點髻螺駟馬長卿人手額珠璣況復倒陰何

寓義順館口占一律

金湜

臨風駐馬午煙生便筭東行第一程斷岸青山松頂
合長江綠水鴨頭平歌聲載道人皆悅草色連天物
共榮華館坐來香滿室陪臣供宴達王情

和金太僕義順館詩錄去求正

張城

江頭綠草喚愁生莫對愁人筭客程一榻好風時雨
送半山殘日暮雲平賢王已盡殷勤意歸使應傳
錫賚榮更喜判書如舊識詩成唱和不勝情

次韻

朴元亨

萬丈紅塵逐馬生，迢迢燕薊幾長程。
盧龍古塞蒼煙杳，歸鶴寒城碧草平。
雙鳳飛從雲闕下，二星光帶玉皇榮。
薰風使罷還朝去，煩奏東韓世世情。

初三日宿龍泉館偶成一律錄呈金先生暨同行朴判書同發一笑且圖郢正云
張 珙

一帶晴雲馬首環，龍泉公館翠微間。
日移槐影來孤榻，風動松聲到近山。
飲少難圖千日醉，事多能得幾時閒。
今朝好伴雲山宿，不久應知又此還。

和張內翰夜宿良策館之作錄似朴判書

金 湜

日日趨朝集珮環豈知騎馬到人間
夜眠屢看天邊月晨起多逢海上山
客路迂回難自料宦情迢遞許誰閒
平生不識玄真子何處題詩問大還

次韻

朴元亨

隔林孤館小溪環極目雲煙浩渺間
谷鳥有情啼白日野花無語傍青山
舍人騷雅詞華妙平子風流氣像閒
讀罷新詩翻怪訝嚴程未半又言還
金太僕見和龍泉詩復用原韻答之

張城

幼晤曾聞陋探環幾年簪筆玉堂間
豪來詩思輕巫

峽老去才名重太山寫斷湘雲清興足玩窮周易宦
情閒慚余同拜東巡命千里江山共往還

次韻

成均注簿金季昌

仗節來遊似轍環中原一髮指雲間江分天險浸
西紀地近遼陽拱北山聖主膺圖芝詔下邊氓
莫枕鐵衣閒將軍玉帳無餘事獵罷胡笳日暮還
抱城江水碧回環江上紅亭杳靄間路出東西通
玉帛地分南北異湖山沙塲久矣黃塵靜蓮幕脩
然白日閒東國千年閱壽域淳風誰道莫能還

車輦館午飯

金湜

從容一飯傍林臯坐對南薰首重搔
滿地蒲茵連草席盈庖海錯間溪毛
平生素有觀風志今日偏多問俗勞
借得肩輿輕似艇披襟一路泛松濤

和金太僕過車輦館韻

張 珣

一聲長笛起林臯萬縷心絲亂若搔
自謂百年渾是夢誰云三伐更生毛
天邊見日思雙闕海上觀風過二勞
堪笑宦途空碌碌醉鄉閒殺晉山濤

端陽日登新安館樓有感

一上高樓思渺茫不禁佳節又端陽
天街宴集應誰念驛路登臨祇自傷
愁見青山增旅况強斟綠酒助

詩狂湘魂千古無人弔醉倚南風看日長

次韻

朴元亨

悠悠斜日度西臯爲有清愁首重搔
深樹黃鸝調好舌晚塘白鷺刷寒毛
雍容車騎領高雅狼藉杯盤慰遠勞
忽得佳詩神覺爽月臨滄海起霜濤
海天愁思更茫茫多少歸心憶漢陽
采艾偏驚時節換泛蒲還洗客情傷
村雞報午籬邊靜番馬嘶風野外狂
要識太平真氣像東韓化日正舒長

仁壽府尹姜希顏

駢駢四牡渡江臯詩興還如癢處搔
揮却雲間五

鳳手禿殘月裏千兔毛高才有客能專對大雅何
人賦獨勞雨露 皇恩均四海星槎隨處穩波濤

郭山郡雲興館遇端午

金湜

路入雲興幾渡河盤回轉覺地形多高低沙壠層層
麥斷續溪田處處禾海上魚鹽時有利城中官府舊
無科我來正值端陽節誰解龍舟競汨羅

次韻

刑曹叅議李

芮

詞臣才思似懸河一代文章制作多已爲 天朝
歌瑞麥又從藩國賦嘉禾遠人識面新頒 詔四
海傳名早捷科客裏正逢端午節征衫如雪試輕

羅

迢迢使節渡遼河路入東封勝賞多海徼已知霑
睿澤田原行見擢嘉禾詩懷觸景應無盡飲量隨
宜豈有科千載楚鄉遺俗在粉團蒲酒眼前羅

上西門嶺

一路惟此嶺最高

金湜

峭壁危峰勢入天馬蹄高下費攀緣雲深只覺山無
路樹老方知地有仙背雨寒巖猶帶雪臨風藥草欲
生煙回頭恍惚層霄外一派松聲雜澗泉

嘉平館席上次金太僕過西門嶺詩韻

張城

厓回路轉勢連天開鑿應知不記年初訝地形何懼
客却疑身世已登仙笳聲亂颭松梢雨旗影平分樹
杪煙勝境由來宜勝賞東人況有酒如泉

次韻

朴元亨

層峰疊嶂欲摩天古樹槎牙問幾年蜀道度猿愁
李翰黃泥踞虎老蘇仙無端迷徑皆蒼壁何處尋
村有白煙一館也能依嶺在薄茶新汲惠山泉

吏曹正郎李孟賢

西嶺嵯峨斗挿天登臨有路可夤緣還疑汗漫凌
雲漢直欲遨遊挾羽仙地近蓬瀛聞日月天連滄

海渺雲煙登高作賦知誰最使節高吟思湧泉

至西門嶺登嘉平館樓

金湜

蒼松路遶石門賒下馬分明似到家過屋杜梨初結
子盈堦芍藥半開花嶺頭風起鳴巖瀑溪上雲來接
海霞向晚登樓閒坐久夕陽畱影送歸鴉

次韻

中樞院副使徐居正

徙倚危欄北望賒五雲何處帝王家夜來空館連
聞雨春盡江村不見花自有壯懷窮宇宙可無佳
句答煙霞晴川芳草驚人語醉掃華牋字似鴉

途中述懷

金湜

客路桑麻處處青誰將生意問園丁老來更覺詩無
味醉去方知酒有靈燕領虎頭非我相雲臺麟閣是
誰形相逢莫道山林遠自是塵心未肯冥

次韻

吏曹佐郎閔粹

山牟半熟野苗青節序駸駸斗指丁雙鳳聯翩啣
帝詔十行新播暢皇靈慣吟風月憐知己醉撫
乾坤任寓形竣事歸來須努力莫將身世付鴻冥
自博川至清川與張內翰朴判書同舟而濟甚
可適也爲書一律請教云

金湜

湛湛清川似博川兩江相近不相連山逢斷岸多沙

磧路遶平蕪閒水田渡口閒亭低拂樹城頭高閣上
叅天一時騎從來如雨人在薰風罨畫船

席上和金太僕渡清博二川江韻錄去請教

張城

三客相將渡二川文同異域亦情連遊魚避槳潛深
藻宿鷺驚帆過別田岸古分明來赤壁波平髣髴坐
青天鮫人莫向窮淵泣不是求珠海估船

天順八年端陽後二日予嚙命過安州登萬

景樓退于安興館會燕酒半適朴判書姜府尹
金觀察求題因書升八字置諸樓壁以備州中

一故事云

金湜

列騎如林障遠塵青山如畫草如茵
醉來一賞清川曲喚起高樓萬景春

金太僕席上口占一絕因卽其韻亦寓前意云

張璠

金蓮蹴起畫堂塵得似清溪坐綠茵
一任風光自流轉從來松柏不知春

次韻

朴元亨

洛妃羅襪步生塵學士簪花映錦茵
風送微涼來蒲座好教人醉洞庭春

安州館席上卻妓

張 璠

江南慚愧好風光
情重何須出艷粧
銀甲彈箏非我事
絳紗籠燭是他鄉
閒心久與梅花約
客思寧隨柳絮狂
寄語巫娥休入夢
免教宋玉賦高唐

適同太僕金先生登萬景樓見陳內翰高太常
皆有詩以詠其美欲步其韻前人又嘗先之因
賦短歌一章用紀歲月云

萬斛舟我曾駕千里駒我曾跨
男子生而志四方我愧遨遊半
天下神仙寄跡多樓居欲登豈
憚雲山迢可憐勝地不常盛相
逢強半成丘墟也曾登岳陽洞

庭湖上滄波長也曾問黃鶴鸚鵡洲前白雲薄樓居
樓居不可畱歸來天上從龍遊龍飛命我使東海偶
過薩水登斯樓斯樓亦奇特不與尋常侔上連縹緲
孤飛之浮雲下瞰盤旋百折之清流數州山色淨如
洗佳趣分明來坐裏漁童樵叟隔溪歌鷺子鶯兒傍
簷語畫棟雕樑映翠微朱簾捲雨紅塵稀閒鷗不解
忙人意江邊浴罷樓前飛十千美酒十千景暢飲何
妨醉還醒回首龍樓天與齊古來舊事休重整

登肅寧館樓有感用東朴判書閣下冀倡而伸
之

都城一別四十日每爲登臨思不禁遠樹縱遮千里
日老天還識一生心雲無定迹依簷宿鳥有餘情繞
棟吟安得清風來兩腋飄然吹我度遙岑

金湜

奕奕高樓對遠林閒花落盡教誰禁朝朝行路難爲
別處處看山易上心賓館華筵重疊醉故人佳句短
長吟臨風回首斜陽外家在江南第幾岑

次韻

朴元亨

海外相逢嘆異音欣然目擊思難禁只將流水彈
高調莫把青松誓此心惱我客情雙燕下助君詩

興一蜩吟千蹊萬徑同經過又見飛旌暎遠岑

承文院正字崔淑精

落盡羣紅綠滿林宦情羈况兩難禁一天風雨登樓興千里江山倚柱心芍藥開殘春後色松杉吹作晚來吟他時記得經行處海上雲煙矗萬岑

闌干百尺倚雲林遠客閒愁自不禁霞鷺天邊千里日暮鴉城外百年心排簷綠樹牽詩興滿座清風入醉吟回首帝鄉雲萬里斜陽冉冉下遙岑

謁箕子廟

金湜

亡身去國念宗親誰說佯狂便辱殷周武封來無棄

主魯儒論後有良臣山連平壤墳長在路遶同江廟
屢新奉 詔經過春似海千年文物見東人

張 城

一朝佯狂豈背親的知天命已違殷道傳洪範曾何
隱土胙朝鮮竟不臣立教無前身作古報功有後禮
惟新當時宗戚知多少今日如公得幾人

次韻

朴元亨

興亡與國義兼親可奈天心已釋殷却把禹疇聊
授聖竟嫌周粟肯爲臣千年古廟壇煙裊一酌芳
尊澗藻新獨掩陳編吊遺跡乾坤寂寞有三人

入平壤

張城

四牡日驅馳駸駸抵平壤朝鮮舊封土規制頗宏敞
青山半村市遐睇入莽蒼居民聯蔀屋出饁具朝餉
聞詔從天來歡抃式瞻仰駢肩夾周道迎樂合羣響
館門候衣冠再拜至稽顙東藩素秉禮茲焉亦可想
皇仁海內外億萬永宣朗

渡大同江承朴判書金觀察宴別因書一絕并
致謝意云

金湜

江草江花遶岸生滿船簫管奏昇平清尊相對人如
玉不待題詩也有情

大同江宴別

張城

渚禽驚飛江水滿岸柳條長綠莎短水光暎日射宮
袍莫把王程滯絃管朝鮮尚在江之東詔從天
府來從容恩波濶似此江水千秋萬古長朝宗

登黃州廣遠樓

驂駢暫息向黃州與客同登廣遠樓碧漢可招黃鶴
下青山不礙白雲浮畫闌曲曲曾扶醉細箔垂垂莫
上鈎京國未能忘一飯賦成猶自愧枚鄒

金湜

此是東藩第一州幾多佳景在高樓千山雨過天無

際萬壑雲來地欲浮仙子醉歸風似水美人歌罷月
如鈎登臨莫笑詩難就老我從前不姓鄒

次韻

朴元亨

崢嶸豪氣蓋雄州獨倚元龍百尺樓翩似雲乘雙
鶴去超如海駕六鰲浮飄飄綉闥風生檻淡淡珠
簾月半鈎老子於斯興不淺詩成何用恨非鄒

登鳳山環翠樓

張城

陰陰夏木四簷封遠近嵐光淡復濃山勢東來迎舞
鳳京華北去仰飛龍碧梧曉日三千樹丹穴晴雲
幾萬重仙子玉簫如可借翩然吹上最高峰

金湜

東來千里說箕封一上高樓興倍濃作賦詞臣多倚
馬放歌豪客舊從龍地連滄海潮聲近簾捲青山樹
影重此日登臨須醉酒明朝回首隔羣峰

次韻

朴元亨

路上行看穴螳封今朝雨意十分濃東韓勝地登
黃鶴中國詞人見士龍雲羃山頭螺髻碧潮生海
口蜃樓重翛然坐我蓬萊上始信塵寰有玉峰

工曹佐郎魚世恭

山河表裏舊提封世沐皇恩雨露濃星使文章

追賈馬 天朝人物藹夔龍遠遊遼海三千里曾
過秦關百二重日下五雲長在望夢魂飛到萬年
峰

使星超遞下箕封雨露新頒特地濃瑞彩爭看
詔鳳重華咸仰御天龍來投館宇岑樓迥坐對杯
盤海味重詩思忽然生眼底捲簾南北揔奇峰

登鳳山樓寫竹

金湜

滿目青山到鳳州入門下馬便登樓誰知五月炎蒸
裏別有人間一段秋

其二

遊遍朝鮮幾十州無端風景在高樓題詩不盡登臨
興更寫湘江數葉秋

登黃州樓太僕金先生寫竹置樓上且系以詩
予卽其韻以唱之以稿求正云 張城

東藩豈意有黃州且把高樓當竹樓不是四明狂客
在誰能添與一枝秋

其二

鑠石流金遍九州客途隨處一登樓今朝誰送瀟湘
雨涼入南薰宛似秋

次韻

朴元亨

衝塵又復走西州剛厭煩敲試上樓能事也歸三
昧手一枝分與渭川秋

陶令平生耻作州柴桑無地起高樓只應心事多
蕭散閒掃森寒一徑秋

朝鮮自四月下旬民以不雨憂五月十一日與
太僕金先生至黃州鳳山館憇於館之環翠樓
時火雲四壁槁苗連野予輩亦爲之動色少頃
日晡雲合霈然而雨次日乃霽予復就道田苗
人意較昨甚殊予亦爲之忻然因賦一詩以記
之幸毋以工拙誚也

張城

汪洋恩澤下三台旱魃焉能久作灾正苦火雲千里
布忽看凉雨一時來迺疆迺畝皆回槁非玉非珠自
阜財我愧異鄉爲異客今朝也得笑顏開

次韻

朴元亨

彌月昂頭夜望台昭天雲漢怕成灾我曾欲駕雷
車下誰遣能鞭電母來膏澤沛時知帝賜嘉禾
熟處是民財五絃彈罷君王笑永日南薰玉殿
開

喜雨有述錄奉朴判書求教倘沐和章尤爲幸

幸

金湜

一夜甘霖遍九垓客途無復畏炎埃纔看生意通禾黍便有懽聲動草萊沴氣盡隨流水去客懷重對好山開東人笑指雲龍使帶得天邊沛澤來

次韻

朴元亨

隱隱填填動八垓須臾白雨洗黃埃梅林帶潤連溪樹麥隴分青轉野萊喜入小亭揮穎罷涼生細簟喚尊開逢人盡道神龍起不識回天一念來

寶山館有懷

張城

廉纖晴雨濕征衣公館忻看住翠微嵐影入樓簾影重松聲出壑鳥聲稀詩哦樂國初成陳酒打愁城未

解圍怪底畫樑雙鷺子如啼如訴故飛飛

予平生最愛山今來海上行止其間者幾兩月
似有厭意且君恩未竟縱深愛而不能有也
因賦謝青山詩以見意云

愛山欲向山中住只道山中無限趣今來日日看青
山却道青山無用處幽鳥空啼谷口雲好花不與佳
人遇登高陟險無康莊控寂乘幽有深懼我聞僅足
避征徭官司不怕青山高縱使深居巖穴中供需日
索人相交又聞只有天台好地隔塵寰飯梨棗當年
劉阮誤相過尤恨癡心不歸早嗚呼世路無坦途人

心莫妄圖隨遇而安聖賢事逃名避世非吾徒我今
揮手謝青山不用相思來夢間

懃金巖館有作求和

金湜

自憐爲客少知音縱得詩成亦懶吟山號鐵山何有
鐵地名金地本無金官司慣領兵農職民庶常安負
戴心處處經過茅屋小幾回歇馬就松陰

次韻

宗廟署丞李則

帝遣詞臣矢德音懃來孤館一閒吟乘查爭看張
騫節垂橐曾無陸賈金一札十行明主詔三呼
萬歲遠人心君歸侍從龍墀日太液鶯花滿院陰

興義館偶成求和

金湜

千里東行異語音幾回開口復沉吟民生自古多需
布土產從來不貢金文士効謀多守職武人懷惠易
傾心兔山牛嶺纔收雨一涉豬灘又夕陰

次韻

奉常錄事柳休復

天詔擎來播玉音湖山勝處動高吟談傾四座
憐霏屑賦罷千篇訝擲金走卒皆知司馬姓峨洋
誰解伯牙心多君得意風雲會珍重功名惜寸陰
興義曉行求和章

金湜

清曉題詩下驛樓四山雲氣未曾收草頭宿客將驅

馬溪上居人已飯牛達面嶺南松漸少國青路北栗
偏稠一番暑雨初晴後處處薰風又麥秋

次韻

僉知中樞金壽寧

海天飛駟獨登樓豪氣元龍浩不收漠漠長空迷
去鳥深深芳草沒行牛分溪白石灘聲急夾路青
山樹影稠好雨已隨車馬至陂塘五月欲先秋
亂山崑崙擁高樓蒲座微涼暑氣收風定庭心飛
野馬雨餘簷角上蝸牛千家翠幄桑初嫩萬頃黃
雲麥正稠詩思怪來清到骨凭闌披得一襟秋

登金郊驛樓和張給事韻

金湜

莫道山高不可攀樓居偏近白雲間從來好景人難
遇其奈浮生我未閒滿壑清風花落去一簾微雨鶯
飛還遙憐舊日題詩客正在中朝侍從班

次韻

判漢城府事李石亨

危樓百尺獨登攀縱目浮雲掩靄間迥野煙光天
際薄長堤草色雨餘閒跳丸荏苒催寒暑周道逶
遲倦往還回望帝鄉千萬里可堪吟罷憶朝班

登金郊驛樓

張璠

閒花落盡已南風客路登臨感慨同夜雨平添芳樹
綠曉霞斜映錦袍紅回瞻北闕微茫外却道東藩

皇華集
指顧中景物撩人詩思惡一聲長笑海天空

到開城府遇雨

金湜

馬前突兀見高城千古東封說舊京拂霧好山看處
碧挿天華館坐來清百年民物關風化一代衣冠識
老成明發正須宣沛澤四郊霖雨夜如傾

次韻

同知中樞梁誠之

前朝雲物草連城星使遙臨吊廢京舊業已隨陵
谷變遺風猶記管絃清未妨屬酒畱連飲且可搜
詩取次成甘澍忽隨天詔至皇恩偏向海隅傾

席上閱妓

張珣

開城不是武陵津驚見桃花幾樹春旅館縱當風雨
夕宮袍肯染路歧塵芳心已許同枯木翠羽空勞聒
醉人薄霧輕雲容易散青山依舊倚秋旻

和張內翰閱妓詩

金湜

二八卿卿別姓鴉坐來平地玉生芽自將身比宮中
燕翻笑人如井底蛙舞態千般欺柳絮芳心一點醉
桃花有時召入巫山路錦障羅幃步步遮

再和閱妓詩

公館筵開散曉鴉廣庭初淨草無芽霓裳競舞雙飛
蝶歌吹平分兩部蛙共說綠珠能勸酒誰知紅拂慣

簪花醉餘偶送看山目紈扇齊將粉面遮

遇雨通宵客懷頓惡無以消遣因詠成詩聊求

和章

昨夜心情昨夜身幾番堪喜又堪嗔誰教遠道觀風
使來作虛堂聽雨人郭外有山來爽氣城中無路起
炎塵遙憐明日新京路萬草千花別是春

承示佳章不勝忻艷敬步嚴韻亦情而已非敢

言和也

張城

千里江山一病身每於樂處暗生嗔青雲得路雖多
日白首知心有幾人醉後詩篇聊撥悶雨餘花陌不

生塵雙旌又載朝鮮道笑聽人謠萬歲春

次韻

工曹正郎崔 灝

專對優才屬一身間關行邁不須嗔開城風雨浪
浪夜浙水家山渺渺人旅館孤燈成遠夢短亭歸
路泥輕塵東藩快覩雲間鳳
詔來宣萬物春

過榛柳二峴有作求和章

金 湜

披榛拂柳歷崔嵬俯瞰羣山浪作堆片片雲從脚下
起星星人向空中回東呼西應聲難辨高去低來力
易催家在 帝鄉何日轉三千里外一徘徊

次韻

成均司藝金永濡

間關行度兩峴嵬眼底唯看衆皴堆水赴石砭長
怒吼人從木末更盤回濛濛嵐霧松杉沐攬攬干
旌鼓角催正似王尊試險日無端立馬故徘徊
行穿犂确上崔嵬爛熳煙霞疊翠堆山與雲重爭
律帆路隨溪轉幾縈回奇觀始信乾坤大旅况從
教歲月催翹首九霄何縹緲高吟立馬久遲徊

冒雨過臨津一絕求和章

金湜

拖煙帶雨渡江天兩岸農人喜欲顛共道玉龍行雨
使故來東土作豐年

次韻

成均學諭金 紉

甘雨濛濛靄九天田翁相慶扣華顛
皇華自是商霖手何況龍飛第一年

渡臨津江畱舟中

張 璪

渡臨津臨津潮正急雨灑蒲芽新
江花十里紫步障岸草一帶青
絲裯畫船載酒斫鮮膾風味彷彿西湖
濱俯仰鳶魚間天地同吾仁
朝鮮素秉禮遠邇來賢臣
臨流勸我飲禮意殊殷勤
我飲詎能安辭君逾五旬
安得此江變作鬱金色添我萬壽杯中春

登大平館樓短歌

朝鮮大平館前之題詠者頗衆意足景到殆

無置詞處予故借其名義賦此以紀歲月云
皇風一掃胡元俗玉帛梯航來萬國熙熙皞皞百年
間處處人誦大平曲大平曲聞來久不道此名復何
有一朝將命朝鮮城分明公館名大平當時扁此
豈無意應願長安大平世我聞斯土舊箕封淳龐不
與諸藩同男耕女織士勤學衣冠藹藹中華風推誠
宣力盡臣職天子非常賜顏色嗣皇臨御政惟
新慶禮初成來寵錫綸音已布綵幣頒驅馳數月今
始閒同行金太僕拉余登館樓樓高爽氣多五月如
三秋眼前風景總堪惜那更賢王能好客大張華

宴慰遠勞醉裏登臨思何極畫闌深處午煙迷野馬
不來簾下嘶濤聲響遍老松嶺鶯梭織盡垂楊堤南
山北岳翠如黛過雨桑麻綠成帶天王有寵國無
虞又見一番新氣槩大平館今已到更上高樓發長
嘯皇明受命億萬年應許重來共吟眺

皇華集卷之六

皇華集卷之六

皇華集卷之七編目

天順八年甲申頒

登極詔使二

皇朝通志卷之六

人倫彙編
家範典
孝行記
卷之六

孝行記
卷之六

皇華集卷之七

登大平樓喜晴

金湜

連朝好雨愜羣心一日新晴直萬金千里客來雲作路
九重詔下玉爲音洋洋喜氣青天濶蕩蕩恩波
碧海深已醉國王通夕酒登樓題作大平吟

夜宿大平館述懷錄似朴尹二判書同發一笑
夜眠公館絕塵心夢裏還疑地有金隔幔人圍燈燭
影滿山風送海潮音謝安老去閒情逸李白狂來酒
量深試取床頭雙玉笛與君同和歲寒吟

再用登樓之韻爲賦一律錄奉判書侍史

千里相逢識此心
溫溫如玉斷如金
字模晉帖歸神
妙詩範唐人得正音
拂霧曉行官道遠
張燈夜語畫
堂深尊中有酒須同醉
好與明朝是別吟

又用登樓之韻賦一律錄似館伴尹判書博一
笑

青衫白髮舊丹心
客路寧辭暑燄金
錦綉城池宣沛
澤煙霞樓閣會知音
月明東海鷗波靜
雨過南山豹
霧深我有清詩三百首
便須畱作異鄉吟

張城

同上高樓散客心
南風解愠勝南金
浮雲故故開晴

日幽鳥頻頻送好音將
命不辭千里遠思君偏
覺五雲深東藩喜得多佳士
且把新詩共唱吟

次韻

朴元亨

傾盡從前不見心
蘭陵美酒瀉黃金
愧將下里巴人曲
酬得清風大雅音
桐葉陰濃侵檻冷
榴花香簇入簾深
開歡未洽歸期迫
三復江雲渭樹吟

兵曹判書尹子雲

丈夫弧矢遠遊心
不向床頭怕盡金
傾盖已應如舊識
論文未必愧殊音
滿簷風雨簾初捲
半榻琴書夜向深
景物縱然非故國
興來猶自費長吟

適間張知事來始知有和金太僕詩亟求一見
如得拱壁令人不忍釋手茲用原韻草吟以奉
所謂刻畫無鹽而唐突西子也

張 珙

未識容顏已識心信爲國器豈渾金情嫌易醉逢醇
酒道苦難聞遇大音縹緲樓臺雲裏近寂寥庭院雨
中深時時幸與春風接得句無妨取次吟

次韻

朴元亨

客窻無處破愁心唯有詩成擲地金香裊博山銷
半穗琴希流水有遺音荷風吹暖方塘靜梅雨分
涼一院深喚起玉人吹玉笛夕陽寥亮作龍吟

尹子雲

平生自信仗忠心海日來看萬頃金
瑞霧披瞻天上節薰風吹入曲中音
弟兄四海情非淺酬唱三杯興轉深
白雪陽春誰和得揮毫聊復動高吟

席間見和金太僕詩意遠而詞新誠足儷美古
作戲用原韻湊拾稿呈幸勿厭其效顰而走也

呵呵

張城

一日相知萬古心從來交義薄黃金
最憐各泥殊方語且喜同鳴治世音
愁極只嫌歸路遠情濃不計酒杯深
明朝回首應千里雲樹重重鳥自吟

今早至成均館謁先聖禮成復退于明倫堂會
諸師生禮意秩然有足觀者因書一律以紀歲

月云

金湜

千年至聖百王師不到真儒未足知一德恢弘天地
準六經昭鑑日星垂生前轍跡環諸國歿後威靈遍
四夷此日東封瞻拜處正逢吾道大亨時

右謁先聖廟

自昔賢才重搢紳由來模範在成均儀庭已見鳴岡
鳳瑞世還看在圓麟絃誦熙熙三舍曉衣冠濟濟九
齋春等閒文字何須論道德吾將合至醇

右會明倫堂

樂閒軒爲尹判書賦

林深茅屋兩三間見說朝回便掩關
渴有水兮飢有粟行看雲也坐看山
陶公已棄庭中甕邵子能忘靜裏環
誰是得閒閒不得鳥啼花落兩斑斑

書錢唐王應奇所畫紅黑梅贈朴判書

張璠

天上春來特異常梅花也作杏花粧
只言顏色無差別誰識調羹滋味長

右紅梅

集
誰將一斗金壺墨盡染孤山玉蕊花
鐵石心腸元不改肯隨桃李競春華

右黑梅

書畫梅又贈尹判書

翠禽叫落羅浮月薄霧深籠一樹春
俗眼看來都不識暗香自足動騷人

右黑梅

孤山風景近來非縞素佳人盡着緋
彷彿武陵溪上立落花流水繞漁磯

右紅梅

擬陳翰林却妓詩求和

金湜

浪說巫山事可憐何曾雲雨夢相牽
皓歌自舞空中雪綠酒誰收掌上蓮
柳絮霑泥禪已定桃花暈臉笑
空妍清風明月尋常夜公館從來慣獨眠

次韻

尚瑞錄事柳允謙

綽約三行競取憐剛腸肯被世緣牽
妖嬌艷態看飛絮激烈清歌聽採蓮
杜曲煙花空窈窕巫山雲雨浪嬋妍
從今夢斷瑤池圃月滿華堂獨夜眠
雲鬢花顏也自憐高情不受世情牽
翩旋妙舞飛飛燕艷冶新粧步步蓮
誰導魯男持苦節枉教越

女負春妍良緣已與瑤華阻未許郵亭一夜眠
皓齒明眸世共憐陽臺夢罷尚情牽妍妍細步凌
波靨艷艷芳姿出水蓮腸鐵肯紅丹臉嫩眼波翻
白翠眉妍楊州薄行傳今古倚向高樓獨自眠

登漢江樓醉餘有述

金湜

樓頭歌管動薰風樓外花枝暎酒紅雲影波光天上
下白沙青草岸西東五臺舊路春長在百濟遺墟樹
亦空醉後倚闌看日色只疑身在水晶宮

次金太僕詩韻

張璠

漢江樓上倚南風眼底山花幾點紅燁燁五雲常拱

北溟滔滔一水自流東煙霏拂座詩難就絃管當筵酒
易空醉去不知身在客却思早拜大明宮

次韻

申叔舟

臨江高閣起清風畫棟朱欄返照紅渺渺壯觀窮
漢上漫漫喜氣滿天東華聯白雪聞歸詠醉眼玄
花落晚空欲識人間奇絕處樓前深碧水仙宮
張槎萬里駕長風眼底崑崙落日紅王母傳觴玄
圃外令威畱詠大遼東謠聲江水流遺響舞袖仙
標薄太空一夕高遊挽不得人間幻化碧雲宮

判中樞洪允成

十二闌干面面風滄波倒影蘸青紅雲隨黃鶴歸
天上山跨金鼇出海東畫舫齊撐雙櫓動舵船二
掉十分空江山如此非人世身在蓬萊第幾宮

朴元亨

長江穩送片帆風淨練輕搖夕照紅一望青蕪迷
遠近雙飛白鳥任西東湖山十里開新畫樓閣千
層挿半空誰把玉簫驚起鳳聲聲吹落水仙宮

尹子雲

錦纜牙檣漾晚風芳洲落日斂殘紅連天疊疊山
圍北注海溶溶水自東濃淡暖煙浮地遠微茫去

鳥入雲空與闌長嘯憑軒立第一回頭望紫宮

金守溫

錦纜徐牽十幅風花明兩岸映波紅手分鳳節從
天北身泛龍舟在海東點綴白雲山活畫烘溶晴
日水成空百壺更與登高閣矯首蓬萊望帝宮
皇皇萬里使華風咫尺違顏對日紅九闥寵恩
頒自北一區文物屬吾東山從雒岳圍千嶂水合
驪江漾大空置酒徘徊臨極浦日斜樓影倒螭宮

都承旨盧思慎

披披雙袖滿舟風晚渡斜陽一抹紅環珮曉辭燕

闕下瓊瑤時拾海天東酒開金甕傳杯急鱸縷銀
絲放筯空興盡也應歸思苦五雲深繞大明宮

右承旨李坡

醉倚高樓拂面風斜陽淡淡下山紅沿江樹色迷
高下隔岸山光自北東羯鼓聲催雙袖舞羽觴飛
疾百壺空須知鄭重君王意絲絡珍羞出內宮

遊漢江見舟人捕魚感而賦此 金湜

江上風高水流急船頭魚網爭來集傍人但羨魚尾
多寧知水底魚相泣

五月廿又八日遊漢江登樓縱飲乘酣而歌初

不暇組織也觀者幸勿誚焉

張城

既泛漢江水復登漢江樓江花采采動盈掬江草纖纖生客愁汲江一滴硯池底玄雲滉漾玻璃秋驪珠發光不可遏白日驚起雙潛虬平生摘星手幾度登岳陽洞庭三萬八千頃青螺一點湖中央茲樓亦奇構因之望帝鄉五雲渺何許聊此同壺觴醉拍闌干問黃鶴但見水上飛鴛鴦吾聞水不在深樓不高所貴朝宗于海萬古長滔滔先憂後樂一范老後之作者未必無賢豪短歌罷復長嘯樓月夜寒江鴈叫重來駐節定何年聖主恩深同覆幬

次韻

申叔舟

星輶天上來迢迢經五樓玉節正容與望望令人
愁陰霖忽開霽麥隴橫新秋傾都喜郊迓龍旗舞
蟠虬我王重帝命誠意葵傾陽所以慰皇華
懽樂殊未央城南江上樓遊宴娛他鄉蘭舟泛中
流命臣陪酒觴登樓咽簫鼓起我雙鴛鴦臨風發
清詠逸思驚人高懽情孰與江江水流滔滔東人
望山斗磊落欽英豪日暮罷謠舞鷗鳥還相呌捐
玦雜遺珮蘭芷空翠幃

金守溫

我居東海望北極五雲金碧明瓊樓排風羽翼不
可得側身長望徒罹愁天旋地轉萬物覩 皇帝
龍飛第一秋翩翩雙鳳下 九重口噤 丹詔蟠
驪虬碧梧竹實不易得彩羽翩翩鳴朝陽去天尺
五捧日角若對 晁旒朝未央况復中華朝著流
見此粲者來吾鄉蘭舟漢曲碧瑠璃百壺蕩漿飛
羽觴脩竹家家啼翡翠綠堤嬌鎖雙鴛鴦玉鏡荷
花淨如拭冲融倒影雲崖高君不見邇來八萬六
千載逝者如斯恒滔滔登臨騁目知幾人孰爲百
尺元龍豪自從金張兩夫子文章風雅冠一代一

皇朝集
來登此誰繼躅但聞夜夜猿鶴叫英聲萬古流不
泯要之相蔽地載與天幃

李坡

清江一抹碧玉流江上百尺飛朱樓洲渚縈紆望
不極蒼茫風景蕩人愁登臨 詔使兩儒仙六月
探回一襟秋杳然清興入寥廓左招黃鶴右素虬
鳳簫聲聲透彩霞乘風欲度緱山陽馮夷擊鼓漢
女舞黿鼉亦自樂未央平生八九雲夢胸厭飫江
南山水鄉猶憐方丈在海角縱觀細酌流霞觴自
是襟期映霽月肯憐被底雙鴛鴦才名斗南只一

人文章萬丈廬山高應知江漢紀東國朝海萬古
流滔滔醉來落筆驚龍蛇飄飄逸氣凌雲豪自別
星軺空勝地月白只有鶯鷓呌他年天上玉音疎
願把餘芳畱翠幃

遊漢江畱題舟中

張 璪

渺渺蒼波泛畫船乘流上下若登仙錦帆高障山頭
日桂棹平分水面天檣燕蹴花當席舞海鷗藉草傍
沙眠漁人莫布攔江網畱取長鯨吸百川

次韻

申叔舟

桂棹橫江赤壁船風流復見屬蘇仙波浮白鳥潮

連海雨過黃梅水拍天頻送羽觴催燕舞急撾鼉
鼓起龍眠吾王盛意真難副莫怪老臣鯨吸川

朴元亨

渡口潮平泛綵船同登李郭是神仙高樓聳翠臨
無地大野分青接遠天松老陰崖聞鶴唳草深沙
岸看牛眠一區景物如相媚爲有詞源倒百川

尹子雲

使華來泛木蘭船卓犖高懷壓八仙玉節光浮江
上日文星彩曜海東天連空遠岫開圖畫滿座清
風醒醉眠莫厭登臨頻勸酒流年冉冉逝如川

金守溫

萬頃瑠璃一葉船
登瀛使節出神仙
樓高影接雲間月
波淨人臨水底天
渡口白鷗沙際集
隴頭黃犢雨中眠
酒闌却憶當年事
萬古朝宗盡禹川

洪允成

中流初見泛蘭船
樓上登臨望似仙
隔岸暖煙迷遠樹
跨虛危棟認壺天
歌聲乍動醒龍夢
帆影分飛起鷺眠
賓主交懽情不極
使華題詠壓晴川

盧思慎

南風蕩槳放樓船
身世飄如挾羽仙
芳草細勻黃

犢岸澄波展盡白鷗天興來不覺乘流下醉去還
堪枕石眠更向岳陽畱傑句登臨應不負山川

李坡

使華行樂在樓船人道風流赤壁仙綵鷁輕搖波
底日紅粧明媚水中天乘涼慣作袁公飲帶醉偏
憐賀老眠興罷歸來冠蓋散夕陽簫鼓動山川

予在京師聞狎鷗之名甚熟及來國中不克一
遊殊爲悵快因書一絕并作隸古三大字遺之
俾亭長知余景仰之意云

金湜

草亭長對漢江開彷彿嚴陵舊釣臺只有白鷗堪作

伴等閒飛去又飛來

畫竹

新試東藩雪苧袍夜深騎鶴過江臯玉簫聲透青天
月吹落丹山白鳳毛

太僕金先生寫竹且系以詩爲判書朴君贈予
卽其韻以見意云

張城

袖得湘雲滿賜袍閒將一片灑東臯只疑白鳳來瓊
島萬里青天露羽毛

使華贈以手寫素竹與詩今掃彩筠和之庶
觀一二二一之意云

河東府院君鄭麟趾
扶桑出日照金袍手額皇華到漢臯遠憶淇園瀟
灑影心同造化弄筌毛

蓬原府院君鄭昌孫

寵傾三接賜恩袍功業終期配禹臯餘事丹青臻
絕妙每將披閱紙生毛

申叔舟

天上儒仙蜀纈袍筆端清興寄林臯青丘正值千
齡運玉葉瓊枝化翠毛

綠玉脩脩脫粉袍驪黃不管九方臯從知變化應

無盡一見風姿豎我毛

吉昌府院君權 擘

萬里行穿宮錦袍才名不數漢枚臯更將墨戲供
餘事嘆賞令人豎鬢毛

崔 恒

白衣今見換青袍風裁應傳蕩種臯莫怪此君身
便漆丈夫性命任鴻毛
瀟灑臞姿擁碧袍崢嶸壯節挺神臯縱然形變神
常谷知是前身號綠毛

金守溫

東坡集卷之六
十載春風舊染袍貞懷會見雪霜皐誰教白質還
青骨變化中山一顙毛

李承召

霜雪臞姿拔翠袍籜龍風雨變江皐歲寒結得枝
頭實棲集丹山五綵毛

徐居正

此君奇節可同袍玉立亭亭萬丈皐龍騰變化應
多術一夜風雷換骨毛

任元濬

玉立挺挺儼碧袍此君幽獨倚寒皐紛紛肉眼評

眞贗誰料一生三伐毛

姜希孟

天上仙曹綠錦袍翠虬張鬣出神臯誰知畫史多
方便却把丹青變雪毛

李芮

瞥眼青袍與素袍貞心依舊寄蘭皋誰較異同觀
化妙人間萬變竟龜毛

金壽寧

苦節何曾換故袍枉教堅白辨湘臯晴窗披得鵝
溪繭依舊青青頰上毛

題大平館畫壁

金湜

蒲壁雲霞掃不開試將吟袖拂塵埃當年作畫人何處今日看山我獨來

其二

何處茅亭傍水開林深無地着炎埃白雲壓倒溪南樹十二峰頭雨欲來

六月三日出漢京畱別一首書于慕華館

雨後匆匆出漢城便須立馬計歸程慕華樓上雙尊酒崇禮門前十隊兵世子正含難別思陪臣猶重未離情再三揮手薰風路其奈笙歌擁旆旌

次韻

朴元亨

華山山下漢陽城北抵金臺一萬程
虎豹雄關藩上國
貔貅勅卒列神兵
江河共有朝宗意
葵藿偏多向日情
嚴命有期君且去
斜陽望盡送飛旌

題慕華館

金湜

昭代車書萬國同
千年東土舊箕封
家家門戶農桑業
處處衣冠禮讓容
天上有星皆拱極
人間無水不朝宗
我來正布初陽令
喜見葵心向日濃

和金本清太僕慕華館詩

張城

慕華漸覺與華同比屋
淳厖盡可封玉帛
朝天心懇

切詩書教士意雍容東平世系爲今姓都護源流是
舊宗一段忠誠能不替 九重雨露近來濃

宴別慕華館有作稿奉朴判書

見說東藩向化深于今始識慕華心衣冠盡喜歸同
制言語何妨溺異音半月遲畱諳土俗一朝離別隔
雲林到家拜 詔還天府回首多應思不禁

寓碧蹄館蒙

國王遣官持寶劔見贈無任感

佩遂賦一律以致謝忱於萬一云 金湜

一握東封百鍊鋼功成尤費百金裝摩挲冷逼三秋
水拂拭晴飛六月霜曾向國中平叛逆還期塞外掃

攬槍 賢王輟贈歸朝客添得詩囊萬丈光

次韻

朴元亨

冶人清水淬真鋼端爲男兒袖裏裝炯炯元精騰
紫塞差差白刃挾秋霜磔殘社鼠寧須灌殛盡天
狼不用槍領取吾王持贈意莫教容易蟄龍光

畱別 國王

金湜

賢王心事絕嫌猜知我何時得再來華館層樓隨處
好崇山峻嶺自天開秋前客去憐江草暑後人歸問
海苔疎散本非專對職遠遊莫說子長才

六月三日離朝鮮止碧蹄館 國王遣李承旨

送劔具議政金戶曹且携酒爲餞因賦詩以紀之

張城

雲滿江天雨未晴
碧蹄聊爾駐雙旌
賢王贈劔添行色
良佐携尊餞去程
禮數殷勤無盡意
觥籌交錯有餘情
酒闌且莫輕離別
後夜相思空月明

其二

匆匆歸去雨偏多
泥滿長途水滿河
餞別酒濃須強飲
寫愁詩苦莫頻歌
心旌搖曳那能捲
寶劔光芒底用磨
後夜相思應有夢
想隨明月下鑿坡

六月初四日復經臨津就用前韻再書一絕于

舟中

金湜

老我詩中別有天
草書何必似張顛
畫船今日畱題去
回首明朝又隔年

予以使還至開城府適盧都承旨奉國王之
命遠來相慰無任感激遂寫竹賦詩以贈其去
云

見時容易別時難
况復炎天暑未殘
迢遞雲山千萬疊
遠勞使節報平安

初五日國王遣崔叅贊盧都承旨賁酒禮餞
于開城府詩以叙別

張城

遠勞供帳到開城終始方知禮有誠且爲放懷酬雅
意不須屈指計歸程江山此去三生夢雲樹由來萬
古情獨喜年年修職貢應知次第會神京

過紅嶺有詠書于金郊驛

金湜

盡日經行坐笋輿誰知嶺路是砂區一條緋帶垂天
角萬丈朱絲絡地隅塗壁濫充官屋用染衣多助女
紅需紛紛騎從凌空上亂踏人間火齊珠

重過猪灘江因書一律于金巖館

雨後猪灘漲碧波重來無奈客情多長橋已逐狂濤
去短櫂還隨細浪過白霧遠收天際幕青山亂點海

中螺盤回漆嶺斜陽近一宿金巖夜若何

重登興義館後小亭作詩紀之

張城

興義山頭一小亭先時過此憶曾登
當堦草色如前綠對榻嵐光似舊青
雲壓松低殊可挽鳥啼花落不堪聽
征夫促渡猪灘水思逐煙霞入杳冥

重過寶山館

金湜

長途一日幾更衣欲把前程問少微
雨後溪麻收未盡路傍山杏摘來稀
隨時駐馬行厨在到處題詩步帳圍
莫道此情消不得等閒還逐嶺雲飛

憇安城館口占一律錄似朴判書希和章

皇華集卷六
雨餘公館絕炎埃前日看山客又來小逕從教煙草
沒高樓還對野雲開呼風好鳥清如語拂水新禾嫩
似苔一味參湯消百慮不須酌酒費詩才

次韻

朴元亨

此身天地一浮埃役役脩途費往來勝景也曾隨
處有好懷今始爲君閑偶然歇馬臨溪水時復題
詩拂石苔落筆莫教神鬼泣陸君垂老患多才

次金太僕懋安城館詩韻錄去請教

張城

水繞山環絕點埃况逢時雨送青來疎簾不怕重重

捲結綺何妨面面開具膳無人烹白石吟詩有客立
蒼苔詩成揔是陽春調欲和慚非七步才

過劔水有述

金湜

此地重經雨後過其如風物奈人何水忘舊澗橋梁
少路啓深山草樹多車盖有容難矯俗土音無字易
傳訛新來寶劔千金直且向巖泉試一磨

和金太僕過劔水館詩韻

張璠

歸騎匆匆又此過橋傾水溢奈愁何忽看遍野三農
悅敢怪連朝一雨多夷險自當甘跋涉魯魚誰復辨
差訛風波客路尋常事壯節從來耿不磨

劍水途中尋路有感

橋毀奔流路已迷
乘輶遠遠邁山蹊
無媒小逕苔封石
有紀危坡樹拂泥
人苦攀緣隨處歇
鳥忘憂樂盡情啼
過來公館依然在
收拾風光自品題

重過鳳山館

金湜

青青煙草半淒迷
此是山中舊路蹊
瀑水濺來吹作霧
巖花落去踏成泥
便須美酒邀人醉
誰遣幽禽向客啼
歸思滿懷何處寫
好詩隨意慣畱題

次韻

朴元亨

雨沒溪橋去欲迷
緣崖一縷曲通蹊
披榛倦涉重

重水跋馬愁衝滑滑泥滿眼輕嵐渾欲滴避人幽
鳥不成啼臨銅更覺添華髮客意閒將拂壁題

六月九日趨黃州見古城當道聚石欲修之城
邊有草亭兀然而在太僕金先生顧謂予曰盍
一登焉遂與之下車憇其上時判書朴君在側
詢其城名曰棘究其事曰昔脫脫之敗殘兵至
此不克而返以其北山南海之可據也因賦二
詩以紀之

張 城

棘城城上小亭幽與客同登豁遠眸矗矗數峰平地
擁茫茫一水接天流昔聞殘戍空回馬今喜居民盡

皇朝集
放牛自是 聖朝開一統崩垣廢壘底須修

其二

道傍誰爲構茅亭乘興登臨思欲凝面海無波千頃
碧背山有草一簾青荒城廢去還須築舊事詢來不
可聽千古興亡成筭在題詩聊爾紀曾經

小憇棘城之茅亭用張內翰韻 金湜

曾上金山吞海亭大書還記李陽冰別來自愧頭先
白到此誰知眼倍青巖谷嘯閑無虎過海天謠罷有
龍聽風塵不侮詩書國挿棘猶煩守舊經

復和前韻

觀風到處可探幽敢爲繁華亂客眸歲月有期人北
去江河無計水東流田公感慨收羸馬丙相從容問
喘牛我有隨身雙寶劒肯將功業負前脩

大同江舟中阻風雨

浪高如屋雨如拳人在江頭泊畫船咫尺樓臺飛不
上尋常詩酒慣相牽便拚客路三千里筭作浮生五
百年安得魚龍齊起躍掃開雲霧看青天

初十日至大同江值風不克渡小酌舟中金太
僕賦近體一律走筆步其韻

張城

歲老東風得放拳儘來江上阻行船浪花噴雪真堪

懼竹葉浮香且漫傳醉去只言春似海愁來還恐夜
如年韓公已矣憑誰訟聊賦新詩紀別筵

題浮碧樓

一碧浮空去不還誰收佳景畫樓間琅玕色映沿流
樹翡翠光涵隔岸山鏡裏雲霞閒弄影空中日月自
循環莫教仙子凌波去畱與詩人解醉顏

六月十日朴判書諸君期登浮碧樓至大同江
適風雨交作舟不克濟乃不果然咫尺目睫且
有酒對酌亦非虛行也可無一言以詠之因賦
短調畱置其上用爲他時佳話云

同江江上百尺樓樓前江水年年流天吳睡足碧綃
冷起駕蒼虬樓外遊翠旗搖搖拂煙霧草樹芬芳更
回互畫闌屈曲朱簾深清影重重散還布廣陵狂客
天邊來羅衣舊染蟾宮槐手把玻璃瓶呼取葡萄醅
天吳天吳莫相訝會須一飲三百杯酒酣試縱管城
兔風雨淒其鬼神怒天吳奔走不可招笑指青山問
歸路

十一日至順安縣安定館其曉初晴適朴判書
和劔水途中詩送之走筆書此情景以貺之

雨霽心情頓覺閒晚涼卧看法興山半輪殘日峰巒

外幾縷新煙草樹間好景正思呼酒賞美人豈意和
詩還連朝愁鎖雙眉皺今日誰知得解顏

六月十二日至安州是日尹判書以王命賞
酒餞于樓又賦餞別

綠槐高柳鎖南風十二雕闌翠藹中客路又將千里
別人生能得幾回同王公懷土寧非願范老憂君信
是忠有酒且圖今日醉明朝馬首任西東

題百祥樓

金湜

翬飛高構俯江沱幾見廷臣奉詔過雨後兩歧東
嶺麥秋前九穗北川禾青春士女閒情少白髮居人

樂事多滿眼雲霞看不厭還聞海上息鯨波

登安州百祥樓

樓在清川江上

張城

迎祥挹秀構來工俯瞰清江一鏡空蜃氣可能齊棟
宇蟾光容易到簾櫳依稀瀛海洲邊府彷彿蓬山頂
上宮酒罷憑闌還北望醉魂飛入五雲中

蒙

國王見贈鞍馬因詩以致固辭之忱

金湜

雕鞍駿馬慣曾騎奉使還憑四牡馳藩國自知行有
驢朝臣只解享多儀來時喜氣連城郭去日歌聲滿
路歧飽玩青山歸興好依然隨處采民詩

外幾縷新煙草樹間好景正思呼酒賞美人豈意和
詩還連朝愁鎖雙眉皺今日誰知得解顏

六月十二日至安州是日尹判書以王命賚
酒餞于樓又賦餞別

綠槐高柳鎖南風十二雕闌翠藹中客路又將千里
別人生能得幾回同王公懷土寧非願范老憂君信
是忠有酒且圖今日醉明朝馬首任西東

題百祥樓

金湜

翬飛高構俯江沱幾見廷臣奉詔過雨後兩歧東
嶺麥秋前九穗北川禾青春士女閒情少白髮居人

樂事多滿眼雲霞看不厭還聞海上息鯨波

登安州百祥樓

樓在清川江上

張城

迎祥挹秀構來工俯瞰清江一鏡空
蜃氣可能齊棟宇蟾光容易到簾櫳
依稀瀛海洲邊府彷彿蓬山頂上宮
酒罷憑闌還北望醉魂飛入五雲中

蒙國王見贈鞍馬因詩以致固辭之忱

金湜

雕鞍駿馬慣曾騎奉使還憑四牡馳
藩國自知行有驥朝臣只解享多儀
來時喜氣連城郭去日歌聲滿路歧
飽玩青山歸興好依然隨處采民詩

重過清川江

遊遍東藩數十州水軒雲閣慣淹留長時對景多乘興無處看山不到頭疎雨幾番消酷暑長江六月似清秋酒杯詩卷尋常在滿目風煙未肯收

六月望日予與太僕金先生使旋道經車輦館憇于館亭見亭前有松盤曲幾半畝蔥蒨可愛先生謂予曰此亦東藩奇品也可無一言以詠之時倦甚欲眠先生笑曰睡起無詩當如金谷罰也相與就枕少頃予起先生繼之索筆各書所得偶然同韻此蓋道同心同而思慮亦同也

物異而心同則一場佳話豈小哉是用錄似朴
判書必不以倡和爲吝也先生命予捉筆遂僭

首柬云

張城

何年栽植到如今亭外平添半畝陰旋覆全非盤錯
力常青自是歲寒心分明翠蓋圍車輦恍惚蒼虬奮
海濤草草畱題無好句且收奇品入詞林

憇車輦館盤松有詠

金湜

誰言獨樹不成林且向庭前坐綠陰衮衮深根聯地
脉盤盤偃蓋拱天心從教白鶴穿雲起莫遣蒼虬帶
雨吟夢入徂徠風滿袖海濤聲裏晝沈沈

次韻

朴元亨

千年偃盖老如今煙葉雲梢滿地陰解與乾坤持
此節每因霜雪見渠心坐聞靈籟生秋壑誰起盤
龍出碧潯官道怕爲明所誤政須移伴最深林

輪囷老幹挺羣林十里蒼蒼夾路陰官有大夫寧
浼我世無君子孰知心蛟龍應到九原蟄風雨時
聞半夜吟何處玉人青羽盖來攀不覺日西沈

李坡

一節何曾變古今蒼蒼畱得四時陰偶然張蓋邀
行客不用爲官累我心鸞鶴棲來明月夜虬龍吟

罷碧江潯縱成笙簫知音少誰遣靈根托上林
昂蔽老幹古如今復愛蒼蒼滿地陰錯節盤根元
有力凌霄聳壑豈無心日長雲影分官道風動潮
聲撼海潯高節也宜君子賦芳名從此播詩林

重過林畔館爲書一律

金湜

薰風不動路重重草氣相和暑氣濃已厭歸心忙似
箭可堪人語鬧如蜂雲興路口多逢石林畔山頭少
見松正爾中郎將病渴葡萄冰碗坐來供

宿良策館有作

張城

午夜摩挲寶劒環清光飛射斗牛間強斟綠酒邀明

身集
月愁對青燈憶故山兩鬢多因爲客改半生長是看
人閒憑誰借得凌風翮千里都城一日還

次張黃門韻畱別朴判書

予來朝鮮黃門張公靖之曰朴判書博雅君子也公當識之旣至判書適迎于鴨江見其儀度聽其言論究其心術之微則靖之之言信然予素鄙拙而判書視予不減靖之往返陪從幾兩月而敬愛如一日臨別請言予又豈敢減於靖之邪因步靖之昔日畱別韻以見意但工拙之不倫耳效顰之誦烏能免邪

平生愛讀人間書江湖訪遍知名儒後來得官居近
侍鳳池看盡瓊林株嘗憶箕封不相見靜裏心情應
戀戀一朝拜命往諮詢隨處觀風隨處燕殷勤館
我大平樓半月猶言不久畱衣冠濟濟日趨從誰云
異域無交遊箇中朴老尤瀟灑首向江頭遠相迂辭
人當居四子先才名不在三良下相逢一笑已相忘
謩予又促西歸裝自緣王命有程度况爾人事多
匆忙洪河斷澗幾回渡綠樹依依碧山暮勞君將命
復陪行日日同趨舊時路人生厭別喜相逢與君今
日情應同天長地久有時會不須腸斷雲無蹤雲無

蹤在天際逐霧和煙曾滿地滿地氤氲掃不開總是
離人畱戀意君不見耕田夫東村飲罷西村呼又不
見釣魚子卒歲何曾經府史等閒不識利名愁却笑
吾曹真浪耳吾曹不是忘世流甘心且泛風波舟
娑娑布幕義州館後夜月明相對愁

義順館畱別朴判書

金湜

東藩人物舊儒流來往多煩作伴遊華館清尊陪我
醉錦囊佳句爲誰畱松山雨過消殘暑鴨水風生判
早秋珍重國王分別後莫教頻上大平樓

六月十七日宴別朴判書徐中樞院使禹牧使

李承旨于義順館復用別尹判書詩韻賦此見
意庶彼此之情均耳

張 瑄

轉頭又欲見秋風數月渾如一夢中明日定知蹤跡
異今朝且把酒杯同我朝自是多行義爾國由來久
盡忠錫貢往還無間歲莫歌渭北與江東

贈都事金性源

金 湜

平安一道貫秋江幕下憐均面帶霜東土詩書曾有
種生兒都作賓家郎

張 瑄

入幕爲賓譽日新平安一道爾秋霜坐來公館清如

水爭美蓮花似六郎

畫竹

鷓鴣啼雨隔江聞
湘北湘南客路分
誰把颼颼青鳳尾
九疑山上掃秋雲

其二

凍雨霏霏歲暮天
千紅萬紫總蕭然
誰知勁節虛心物
獨傲西風在渭川

贈寧邊判官李淑琦

金湜

一宮瀟灑卽髯翁
終日相看在眼中
遙想明朝辭我去
依然花筆判春風

書付寧邊李判官得佳兒一絕 張 瑄

十歲孩兒氣最清
膝前常有讀書聲
世間豚犬知多少
美質由來貴玉成

其二

寧邊判官李淑琦
文才武略人稱奇
從行日久別我去
相看自覺情相羈
斜風細雨晚來急
應爲行人重別離

予奉 詔至朝鮮而司譯院判事朴枝爲通言
使侍予幾兩閱月終始無少怠可謂能而有恒
者臨行爲書此貽之 金 湜

一方鄉土一方音司譯從來不易任轉却華夷三寸
舌便通中外兩家心廿年上國頻朝會幾夜東封
伴醉吟臨別有言吾報爾來春二月定腰金

司譯院判事朴枝從行日久敬慎不替臨別書
此以貺之

張珩

南風吹江波促我西還棹念子久相從去我耿懷抱
懷抱將奈何天子有明詔

予至朝鮮國王遣副知司譯院事張有誠侍
左右通言語往返幾兩閱月朝夕未嘗少離勤
慎惟至且每食素食常若有憂心者予詢其故

曰親喪未終耳噫有誠其知孝者哉於親如此則其所以事君者可知矣其國素稱秉禮於此亦可考焉因爲詩以貺之

百行孝爲本黽勉在人爲所以古聖賢諄諄垂訓詞
朝鮮張氏子親喪能自持終歲祇饘粥朝夕恒憂思
孝子天不匱錫類來蕃禧

寫竹贈知印朴彬

金湜

日暮到江亭匆匆欲問程虛窻一夜雨點點是愁聲

書贈朴彬

張城

引雛江鷺羽差池綠樹重陰正此時天意亦知人欲

別片雲應爲汝催詩

送正使

朴元亨

臨分承索贈別詩重違命祇叙情云耳詩
不足觀

宿雨初收潮欲平蘭舟曉送使星行
杯深鸚鵡千重意
詞罷驪駒一片情
鶴野歸旌雲影遠
鴨江孤館月華明
不堪腸斷分携處
向晚寒蟬樹樹鳴

送副使

知生新別兩關情聚散都如水上萍
極目忽驚丹鳳去
舉杯相送紫騮鳴
愁深曉雨官河漲
望斷晴

雲驛路平堪笑賤才渾欲盡黯然離思寫難成

贈別正使

李坡

江之水兮悠悠我送我子兮江之頭驪駒闕兮車
載膏泛樓船兮中流嘆逝者之如彼感離別之蒼
茫遼野漫漫兮閭山蒼蒼望行旌兮不可及關河
阻兮道路長樂新知兮悲生別我思古人兮獲我
心帝鄉漸近兮五雲深鴻飛冥冥兮不可攀悵
後會之無期兮獨延竚而盤桓

樂閒軒記

張城

予使朝鮮國王遣吏曹判書尹君子雲陪從于大

平館子雲質溫氣和謙抑惟至終始無惰容且工於
詞翰周於事體予甚重之一日起而請曰昔奉常高
太博使來以汪內翰署書樂閒軒三字見遺予遂扁
於齋未有記之者敢乞一言予惟閒之爲義有暇之
謂也彼山林散逸無爵祿之係無世故之撓始得以
之以之而放浪於煙霞泉石之間逍遙於風月壺觴
之內君不得而臣士不得而友是之謂樂閒若夫仕
于人役於事上得以致君下得以澤民進有爲也退
有思也閒且不可得而以而况欲以之而復樂之乎
子雲年富而力强學優而才瞻生秉禮之邦遭賢

明之主職首六曹司一國人物之衡鑑矧有兼理庶務之託雖才辦不窘而事無虛日茲以樂閒扁其齋得不有以來人之疑議耶雖然人知人之於事有閒否而不知人之於心亦有閒否事之閒否由於外得閒可樂也而不可以必得心之閒否由於內不聞不樂也而不可以不得子雲之樂閒其樂此心之閒乎心之閒豈無思無慮寂然不動之謂殆猶周子所謂動而靜靜而動之謂也子雲受國之重寄言必信於上行必達於下使其心無所主隨事馳逐則上下交錯烏用彼相哉必也因事之冗求心之閒利可欲也

取之而心不安不安不閒也害可避也避之而心不
寧不寧不閒也以至事事物物莫不求吾心之安且
寧者而行之心安則事雖紛紜轆轤人徒見吾碌碌
終日而不知吾心之天廓然虛明瑩然湛寂安舒而
自得寬廣而不撓怡怡愉愉不知天壤之間復有何
樂可以喻此而吾心之閒得矣若曰名足以遂志祿
足以代耕僕隸足以備使令子女玉帛足以致左右
吾得閒矣吾可以樂矣此志於富貴者之所事而非
志於垂聲流芳者之所事也子雲名士也必知之已
審必不以此爲閒而樂予不能忘情故復序於篇終

以規

晚節堂記

士之始仕也職未崇祿未厚行未孚於上下志銳而氣歉歛之恐無聞縱之恐見惡是以莫不勉於立節以圖成及夫積歲旣久信任漸深職崇而祿厚上達而下孚得有重賚失無深譴志滿而氣盈乃曰吾宦成矣吾可以爲兒女子計矣其於立節之初心幾何而能復念哉此吾金太僕名朝鮮判書朴君之堂曰晚節良有以也判書名元亨字之衢世爲朝鮮人早以科目舉於其國歷任三十年有奇在在克著能聲

爲國人所敬服自景泰初元至是幾

缺

年朝廷遣使

至其國者後先十數人回詢其人物之詳皆曰元亨
其一也予深識之而未識終猶落落耳今年 嗣皇

帝卽大位乃以予與太僕公賁 詔勅諭王錫與惟

厚未至其境 王已遣判書爲奉迎使候于鴨綠江

旣濟乃相見於義順館判書進退有儀應酬惟謹深

得古列國大夫體自館啓行踰半月撫景興懷不能

無述判書或倡或和屢有佳製非博學多聞者能如

是乎旣抵國中 王復以判書陪從于太平館朝夕

相與之日益親密乃知其不獨長於才而又優於德

故致其君信任之深而事無巨細悉與謀焉他人至此將拂戾其初心發宦成之嘆爲見女子之計盡隳其節有不顧矣判書乃能恪守初志終始不渝雖寵遇極隆而敬謹益至不惰不驕一物不苟取一事不自擅兢兢然視初仕如一日其謹於全節也爲何如且聞其二子皆舉于科目皆享有祿位一門之內父子齊名是其心雖不急於富貴而富貴之至自有不期然者其亦天相吉人而有以陰厚之哉世常以人暮年獲福爲晚節但其所致之由有不同耳求如判書全節于暮年而自然享有餘祉者豈能多得哉余

不善文姑述判書爲人之槩以著金公名堂之意如此

書張黃門箕子廟碑辨後

予使朝鮮得閱靖之張黃門皇華集內見其有疑柳子釋箕子廟之辨靖之之疑柳子固當矣而予於靖之又不能無疑是用錄出蓋將有望於確然無疑之君子而一之也時天順八年歲在甲申五月九日欽差副使中書舍人維揚晚生張瑊拜識

吾友張靖之疑柳子所謂紂惡未稔而自斃武庚念

亂以圖存國無其人誰與興理之言爲不知箕子之心宜哉夫柳子釋箕子廟碑前此旣以興亡吾國故不忍具是二道有行之者矣是用保其明哲與之俯仰晦是謨範辱於囚奴昏而無邪隕而不息釋箕子之正蒙難矣信斯言也則其佯狂不諫之心終始不臣之志柳子知之已審使其不知則必不能立論如此之確論之確理之明也旣明於理豈有以其不死爲欲圖僥倖於不測也邪但惜其用心過當始終顧忌而於篇終又爲是言而歸於人事之或然也雖然或之之言庶乎可貸而疑之之失誰其貸之嗚呼柳

子不當設疑而靖之不得不疑使靖之疑之而終信之遂以柳子爲不知箕子之心則正蒙難法授聖化及民之論誰能外之

字說

副知司譯院事張有誠從行日久臨別拜請字其名予謂誠者真實無妄之謂自聖人以下皆不能不勉之而自不能信非誠也自信而人未之信非誠也必存於中而無一念之或欺行於外而無一事之或妄斯信其有誠矣誠而克信則守之有所餘達之無不準而爲人之道得矣使言貌若誠而所存或僞則

自省且不信而又豈能信於人邪因字之曰仲信有
誠其勛諸

字說

皇華集卷之七



皇華集卷之七



